

O LE SULU SAMOA



EKALESIA FAAPOTOPOTOGA KERISIANO SAMOA

O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

NOVEMA 2023

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws


POKA TOMA MAUA (FT), 1949 - 2023

NA FOAIINA MAI

E LE AL'I -
ASO SA,
23 IANUARI
1949

74 TAUSAGA,
9 MASINA,
27 ASO.

O LE TAMĀ,
USO & UO,
FAIA'OGA,
MISIONARE,
FAIFEAU,
TOEAINA.



UATOE AVE'ESEINA

ATU E LE AL'I -
ASO TOONAI,
18 NOVEMA
2023

31 TAUSAGA
FEAGAIGA TAULAGI
EFKS SAVAIA LEFAGA

LUPE FAALELE A:

SATO'ALEPAI
SAPAPALI'I
LONA FAGALOA
VAIVASE-TAI

NISI O LE
'AU FAAU'U
MALUA 2023-

SEMIKUEVA
SU'A FS &
FLORENCE

FAAILOGA -
MASTER OF
THEOLOGY



NISI O LE 'AU
FAAU'U
MALUA 2023 -

NIUTUIATUA
ONESEMO AM
& CECILIA

FAAILOGA -
MASTER OF
THEOLOGY



FAASINO UPU

- | | |
|--------------------------------|----|
| 1. O LE LAUGA | 2 |
| 2. AU FAAU'U KOLISI MALUA 2023 | 4 |
| 3. FAAU'UGA KOLISIF. MALUA | 6 |
| 4. FAAFETAIFAI TAULAGA | 7 |
| 5. O LE PEROFETA MULIMULI | 8 |
| 6. NA O AFIOGAE TULEI MAI | 12 |
| 7. O E UA FAI I LAGI FOLAUGA | 14 |
| 8. ATA O MATAUPU LOMIA | 16 |

O LE LAUGA

Tusi Faitau: 2 Korinito 12:1 – 10

Matua: 2 Korinito 12, “9 Ona faapea mai ai lea o ia ia te au, “O lo’u nei alofa tunoa e lava lea e fesoasoani ia te oe, auā o le vaivai e fa’aatoaina ai lo’u mana.” O lea ua tele ai lava lo’u fiafia i le mitamita i mea ua ou vaivai ai, ina ia tumau i o’u luga le mana o Keriso.”

Manatu Autu: **MALOSI I TOTONU O LE VAIVAI (Power in Weakness)**

O le upu ‘vaivai’ po o ‘vaivaiga’ o se faaupuga ua faamatalaina ai le maualalo ma le toilalo o le olaga o soifua ai se tagata. Ua tatou manatu ua faiaina le olaga ma ua matuā leai lava se malosi e toe maua mai ai. E masani foi ona tatou faapea ane, o se upu ua faamatalaina ai se sootaga ua motusia, ma ua lē toe mafaia lava ona soso’oina, ona ua eseese talitonuga ma faamamafa.

O le toilalo ma le faiaina faa-le-tagata, e foliga mai ua leai se faamoemoe auā ua uma le malosi. O le pogai foi lena, e mana’o ai isi tagata, o sosaiete ma faalapopotoga, e fenānāta’i ma ufiufi vaivaiga o taamilomilo i totonu o latou lotoifale.

Peitai le au uso e, a e faapefea pe afai tatou te su’esu’e i nei vaivaiga, ma tatou molimauina ai, o loo i ai iina nisi avanoa lelei, e toe soālaupule ai ma toe aumai se malosi fou e toe atia’e ma toe fausia ai se ola fa’aogāina mo le Alii?

Ua faapena tonu lava le faamoemoe ma le faama’ite a le Toomaga mo e Puapuagatia (Samoa Victim Support Group) e pei ona faasooina ai Upolu ma Savaii, i la latou ‘Sulu o le Filemu’. O se faatinoga o i ai se talaiga malosi ma tāua, e lē gata e faailoa ai i tagata uma o Samoa le saosaoa o le sosolo o sauaga ua faia i Tina, Fanau Teine ma Fanau Iti, a e o le malamalama foi o lea Sulu o le Filemu, ia pa’i atu ma o’oo’o atu lona susulu i mafaufau, loto ma agaga, o i latou o loo faia nei uiga matagā ma amioga vaivai o le ola, ina ia a’oa’oina ma a’oa’iina i latou i nei vaivaiga. Ina ia salamō ma liliu atu i le Alii i le ola moni o ia te Ia.

Ioe, le au uso e, sa faapena foi vaivaiga na aafia ai le aposetolo o Paulo, i le tau amataga o le Ekalesia a Keriso i le lalolagi. O lona sauā i le au kerisiano i soo se vaipanoa na ia maua ai i latou, sa faataunuu lava auā sa ia te ia le malosi ma le pule faa-Roma. A o le pule soona fai, e leai se taunuuga malosi ma tumau e tini i ai. Peitai o le taia o ia i le malosi o le Sulu o le Filemu o Keriso i le ala i Tamaseko, sa mafai ai ona ia iloa ma mautinoa, o ia o se tagata vaivai na ola foi i ni vaivaiga faaletagata. Lea ua mafai nei ona susulu atu le mana o le Alii i lona loto, ma filifilia ai lona vaivai ma le faatauvaa, e avea ma aposetolo malosi a Keriso mo Lana galuega tala’i o le Tala Lelei ia Iesu Keriso Toetu. O se fa’aaliga na tupu ai lona mitamita, auā mai le vaivai ma le maualalo na ola ai, a o lea ua mafuta ma le Alii. Ua na iloa ai foi, o le ala lava lea i le taunuuga i le lagi-tua-tolu, le parataiso o le Atua.

Le malosi lea o Paulo ua fa’aogaina ai o ia e le Alii mo Lana feau, ina ia faapea ona momoli atu i tagata ma tala’i atu i nuu ese i le Tala Lelei. O le ala lea na toe tusia ai e Paulo lana Tusi lona lua i Korinito. Se’i matuā toe faamautū lana talaiga muamua e uiga i le Tala Lelei o le Toetu manumalo o Iesu Keriso. Ua le gata i lena, a e ia faasa’o foi i faia’oga sesē ua latou faasesē le pule a Keriso ua ola ai tagata o Korinito. O le Tusi e lua i Korinito, o se tusi sa faigata ia Paulo a o ia tusia, auā ua le gata ina fa’aali atu ona agavaa faa-aposetolo i le amataga, a e na ia toe aumaia lava se vaega o lona tagata tuai e faamatala mai ai se feau faaleagaga o ia tau momoli atu.

O lona aumaia o le ata o le tagata vaivai ma faatauvaa, o ia lava lea na galue mai i ai le Atua, na ia maua ai le malosi. O ona tiga ma mafatiaga

a o feagai ai ma le galuega tala'i, sa tupu ai pea lona mitamita, auā ua soifua Keriso i totonu ia te ia. Fai mai a ia, “*auā pe a ou vaivai, ona ou malosi ai lea.*” O le kerisiano e vaivai ma faaleaga mai e tagata, a o tutumu pea e le Alii, e malosi pea lava o ia ma olioli i le mafuta mai o le Agaga o le Alii ia te ia.

I le manatu o Paulo, ia lē mitamita ai lona loto ma faamaualuga ai a o tala'i le tala lelei. E ao ina natia le loto fefete, a e ia taula'i pea lona tagata ia Keriso, o Le na aumaia le malamalama ma le malosi ma'utinoa ia te ia. O mea matuitui sa i lona tino, o feau faasufi-agaga ia mai ia Satani, ina ia tupu ai lona faamaualuga. E ui lava ina sautua tolu lana tatalo i le Alii ina ia aveese lea mea, peitai na tali mai le Atua ia te ia, “*O lo'u nei alofa tunoa e lava lea e fesoasoani ia te oe, auā o le vaivai e fa'aatoaina ai lo'u mana.*”

O le Alofa Tunoa o le Atua o le meaalofo a le Atua mo tagata uma, e ese mai isi ana meaalofo e tele ua tatou ola ai. O le alofa e tūmātila auā na o le Atua e i ai lea ituaiga alofa. O le alofa ua faamatalaina ai le matuā ofoina mai e le Atua e Ia o Ia lava i tagata, ina ia iloa e tagata uma o Ia, ma alolofa ia te Ia. O lo tatou alolofa i le Atua, o le faailoga lava lea ua tatou sosoo faatasi ma Ia, o le mea na faia ma Lē na faia o ia (creature to creator). O lona fesootai mai foi i ona tagata, ua aofia ai ma e agasala ina ia maua le faamagaloga mai le Alii, e saofagā ai tagata uma, i le olaga paia faatasi ma le Atua. O le Alofa Tunoa lea o le Alii na folafola atu ia Paulo, e matuā lava ma totoe lea, e tauave ai lana galuega folafola o le Tala Lelei. O ai se tagata a na lē lagona le malosi mai totonu o tiga ma vaivaiga, pe afai na te talia le alofa tunoa o Keriso ua folafola mai?

Tatou te lē maua le malosi o le Atua e tauave ai se valaau, se'i vagana ua tatou salamō ma tatou iloa moni o tatou vaivaiga. O le feau foi lena o i le Sulu o le Filemu a le Toomaga mo e Puapuagatia i Samoa (Samoa Victim Support Group). O e o fiafia e faataunuu ma faia pea nei sauaga matagā i tina ma fanau, e moomia lo latou lagonaina i luma o le Atua, o le vaivai o latou i ai i le ola faaleagaga. A tatou lagona e matagā, faamaulalo i le Alii ma valaau i lona alofa tunoa e malosi ai le sootaga paia ma Ia.

Tatou te lē maua le atoatoa o le alofa tunoa o le Atua, seiloga tatou te iloa muamua lo tatou lē atoatoa. E faapefea ona tatou tusi lima i le la itu,

a e lē se'i tapena muamua o tatou leaga ma vaivaiga? O vaivaiga uma na feagai ma le aposetolo i lana galuega, o le saga faamalosi foi lea o lona ola faaleagaga, ina ia fua mai uma faigata ma tiga sa ia Keriso ia te ia.

O se faalaeiau foi lea mo i tatou le Ekalesia i lenei masina. E moomia ona tatou iloa ma vaai ifo le tagata ia i ona vaivaiga o aso taitasi. Ne'i o tatou feoa'i solo ma taulagi o tatou o tagata o le Alii, a o loo nanā ai i totonu vaivaiga e tupu ai le agasala. Aua nei o tatou manatu ua tatou malolosi atoatoa i le faatuatua ma le fesootaiga ma le Alii i aso uma. Ia manatua o le ituaso lava tatou te lē amana'ia ai le malosi o Keriso tatou te ola ai, e vave tele ona faauōū mai Satani e feula ese le sulu o le malamalama o le Alii, a e tata'i o tatou loto i mea inosia ma vaivaiga matagā, e fano ai le ola.

Afai ua tuuina atu e Paulo lona vaivai ma lona gaogao'i'i e faatumuina mai e le Alii e tauave ai lana feau, o lena foi le au uso e, mo i tatou uma. O tiute eseese, o tulaga tofi maualuluga ma matafaioi ua fa'aogaina i ai e le Alii lo tatou ola, ia 'aua nei o tatou mitamita ai, a e ia faataunuu ma le loto maualalo, ma ia manatua pea le fesootaiga ma le Alii. Pe a tatou vaivai i nisi taimi, ia lafoai atu faigata i le Alii, ina ia faatupu mai lo tatou malolosi. O lona Alofa Tunoa ua lava lea e maua ai e i tatou uma le malosi, ina ua tatou faatuatua faamaoni ia te Ia. O iina e puna a'e ai le fiafia, loto tele ma le olioli i o tatou loto.

Fai mai la tatou matua, “*O lo'u nei alofa tunoa e lava lea e fesoasoani ia te oe, auā o le vaivai e fa'aatoaina ai lo'u mana.*” Le alofa tunoa lena o le Atua na faatinoina ma faataunuuina e Iesu. Na ia tuuina atu ai lona soifua mamā faapei o se tagata vaivai ua le toe i ai se malosi. E ui ina sasaina, faamomomoina lona tino, o lona toto na faamaligiina ma faasatauroina i le laau matagā ma maliu ai, a e o se faailoga tumau lena na faia e Keriso ina ia tatou manatua ai pea, o Ia lava sa faapei o sē ua vaivai, ina ia magalo i tatou uma o vaivai pea i le agasala, e fai ma e o malolosi mo le Alii, pe afai tatou te salamō moni mai le leaga, ma talia Iesu Keriso Toetu i le Salamō ma le Faatuatua. Ona o Iesu. Amene.

Saunia susuga Maleifua Tanielu FS,
Faatonu Matagaluega A'oa'oga Kerisiano
Faifeau Nofoaiga EFKS Apia
MATAGALUEGA APIA

'AU FAAU'U KOLISI FAAFAIFEAU MALUA 2023

BACHELOR OF THEOLOGY:

1. A'oa'o: ALEXANDER PELESALA
Nuu: Satapuala, Saleapaga
Faletua: Townsville Serita Pelesala
Nuu: Magiagi, Vaiala.
Aulotu na su'e mai ai: EFKS East Tamaki
Pulega Manukau Sisifo
Matagaluega MANUKAU.

2. A'oa'o: BRIAN ANAE
Nuu: Matautu Falelatai
Faletua: Liyasi T. Anae
Nuu: Lalomalava.
Aulotu na su'e mai ai: EFKS Matautu Falelatai
Pulega Falelatai ma Samatau
Matagaluega AANA.

3. A'oa'o: ESERA TUFUGA
Nuu: Asau, Vaimoso
Faletua: Malaefou Tufuga
Nuu: Mulifanua, Papa Sataua.
Aulotu na su'e mai ai:
Pulega Purisipeni Sisifo
Matagaluega KUINISELANI.

4. A'oa'o: FIALII MAFUOLO (Peresetene)
Nuu: Fusi Safotulafai
Faletua: Alovale Mafuolo
Nuu: Afega
Aulotu na su'e mai ai: EFKS Fusi
Pulega Safotulafai
Matagaluega FAASALELEAGA.

5. A'oa'o: FILIPILEAPAITAA
Nuu: Savaia Lefaga.
Faletua: Upolu Taa
Nuu: Saanapu
Aulotu na su'e mai ai: EFKS Savaia uta
Pulega Lefaga
Matagaluega AANA.

6. A'oa'o: ISAAGO TUNUMOSO SOLIOLA
Nuu: Sapo'e, Lepa, Sapapalii.
Aulotu na su'e mai ai: EFKS Sapo'e
Pulega Falealili
Matagaluega FALEALILI SAFATA SIUMU.

7. A'oa'o: LAIFAGALAIFAGA
Nuu: Luua, Faga
Faletua: Manutagi Laifaga
Nuu: Gautavai
Aulotu na su'e mai ai: EFKS Luua, Faga
Pulega Amoa
Matagaluega FAASALELEAGA.

8. A'oa'o: LAUPAMA LEFAOSEU
Nuu: Maasina, Fagalao
Faletua: Annette Lefaoeseu
Nuu: Lalomauga
Aulotu na su'e mai ai: EFKS Maasina
Pulega Fagalao
Matagaluega APIA SASA'E.

9. A'oa'o: LOTUFAAMANATU MASOE
Nuu: Asau
Faletua: Emma Masoe
Nuu: Mulifanua, Papa Sataua
Aulotu na su'e mai ai:
Pulega Waikato
Matagaluega MANUKAU.

10. A'oa'o: MALAELOA TOLEAFOA
Nuu: Vaigaga, Gautavai
Faletua: Faasalu Toleafoa
Nuu: Afega, Malie
Aulotu na su'e mai ai: EFKS Afega
Pulega Malua i Sasa'e
Matagaluega MALUA.

11. A'oa'o: MALUAPAPANIULESA
Nuu: Malua, Vailima
Faletua: Maryanne Niulesa
Nuu: Aukilani NSila, Vailuutai, Saipipi
Aulotu na su'e mai ai: EFKS Vailima
Pulega Apia i Saute
Matagaluega APIA.

12. A'oa'o: MANASE SHALOMAFUTITI
Nuu: Toamua, Nofolii
Faletua: Urita Afutiti
Nuu: Tulaele, Saleaula, Solosolo
Aulotu na su'e mai ai: EFKS Peteleema Fou
Pulega Faleata Sisifo
Matagaluega FALEATA.

13. A'oa'o: MATELILITAUTALAGIA
Nuu: Saanapu, Afega, Faleasi'u
Faletua: Toese Tautalagia
Nuu: Aufaga, Maugafiafia
Aulotu na su'e mai ai: EFKS Saanapu
Pulega Siumu ma Safata
Matagaluega FALEALILI SAFATA SIUMU.

14. A'oa'o: MICHAEL POUTASI
Nuu: Vailele, Moataa
Faletua: Nevada Poutasi
Nuu: Fagalii
Aulotu na su'e mai ai: EFKS Vailele
Pulega Vaimauga Sisifo
Matagaluega VAIMAUGA.

15. A'oa'o: PEONILAPANA
Nuu: Fakaofu Tokelau
Faletua: Hela Lapana
Nuu: Fakaofu Tokelau
Aulotu na su'e mai ai: EFKT Fakaofu
Pulega Fakaofu Tokelau
Matagaluega FAKAOFO, EFKT.

16. A'oa'o: SAILIMALO UMALAU
Nuu: Safotu, Saanapu
Aulotu na su'e mai ai: EFKS Peteleema Fou
Pulega Waitakere
Matagaluega AUKILANI.

17. A'oa'o: SEMI IOSIA SITITI
Nuu: Lepa, Safaato'a
Faletua: Fuapepe Sititi
Nuu: Apolima, Saipipi
Aulotu na su'e mai ai: EFKS Mangere East
Pulega Manukau i Matu
Matagaluega MANUKAU.

18. A'oa'o: SHALOMPULU
Nuu: Saleapaga, Lepa
Aulotu na su'e mai ai: EFKS Togo
Pulega Malua Sisifo
Matagaluega MALUA.

19. A'oa'o: SONNY SATIU
Nuu: Salimu Fagaloa
Aulotu na su'e mai ai:
Pulega Manukau Sisifo
Matagaluega MANUKAU

20. A'oa'o: SOLOI KEILANI
Nuu: Vaiala, Faatoia, Iva
Faletua: Tutogi Keilani
Nuu: Matautu Falelatai, Saipipi, Siumu
Aulotu na su'e mai ai: EFKS Meadow Heights
Pulega Melepone Matu & Perth
Matagaluega VITORIA.

21. A'oa'o: SOLOMONA TINI
Nuu: Faleapuna, Papa Puleia
Faletua: Josephine Tini
Nuu: Gataivai, Lelata
Aulotu na su'e mai ai: EFKS Faleapuna
Pulega Anoamaa
Matagaluega APIA SASA'E.

22. SULUFAIGA MARAGINA SAMASONI
Nuu: Fusi Safotulafai, Matautu Lefaga,
Papauta
Faletua: Georgina Samasoni
Nuu: Vaivase tai, Tufuiopa
Aulotu na su'e mai ai: EFKS Loimata o Apaula
Pulega Apia i Saute
Matagaluega APIA.

BACHELOR OF DIVINITY
with HONORS

1. A'oa'o: ELISE PELETI FUIMAONO ALOLUA
Nuu: Salani, Sapunaoa, Malie, Salelesi
Aulotu: EFKS Te Atatu
Pulega Waitakere
Matagaluega AUKILANI

2. A'oa'o: SALEAULA RETI
Nuu: Fagalii, Manono-Uta
Faletua: Moevasa Reti
Nuu: Manono-Uta
Aulotu na su'e ai: EFKS Manono-Uta
Pulega Aiga i le Tai
Matagaluega AANA

3. A'oa'o: TAUMALOTO SALEVAO
Nuu: Saleapaga
Faletua: Josephine Salevao
Nuu: Aufaga
Aulotu na su'e ai: EFKS Saleapaga
Pulega Lepa ma Lotofaga
Matagaluega LOTOFAGA LEPA ALEIPATA

4. A'oa'o: VAAFUTIALAUNI
Nuu: Vailoa Palauli
Faletua: Agneta Alauni
Nuu: Tanugamanono
Aulotu na su'e ai: EFKS Cannons Greek
Pulega Ueligitone i Matu
Matagaluega LAUMUAO AOTEAROA.

MASTER OF THEOLOGY (& Thesis)

1. A'oa'o: NIUTUIATUA ONESEMO
Pepa/Thesis: "E fofō e le Alamea le Alamea' A
Theology of Turning, in Response to the Issue
of Domestic Violence in Samoa."

2. A'oa'o: PAIE TAPULEGALO
Pepa/Thesis: "A Samoan Socio-Rhetoric
Reading of the Epistle of Jude, using Atoau
Hermeneutic Approach."

3. A'oa'o: LAVEAISENE
Pepa/Thesis: "A Samoan Ecological Reading
of Revelation 12 - 14."

4. A'oa'o: RONALD TUIMAUGA
Pepa/Thesis: "Theological and Educational
Implications of Tautua in the Light of Disciple-
ship for Christian Lifestyle in the CCAS."

5. Faifeau: SEMIKUEVA SU'AFS
Pepa/Thesis: "Towards a Samoan-Christian
Identity of Decision Making in a Life-Threat-
ening Situation in an Aiga Samoa."

**MASTER OF THEOLOGY
with DISTINCTION (& Thesis)**

6. A'oa'o: FAAFETAIKORIA
Pepa/Thesis: "Men, Women, and the EFKS"

7. A'oa'o: HOBERT SASA
Pepa/Thesis: "Towards a Samoan Theological
Interpretation of The Holy Spirit in the Life and
Mission of the EFKS, from a Uluulumatafolau
Perspective."

8. A'oa'o: TAFATOLU TAPALEAO
Pepa/Thesis: "Towards a Theology of the Fale
Samoa: A Response to the Ecological Crisis from
a Samoan Perspective."

O le aso 25 Novema i le Fale Iupeli na faataunuu ai le Sauniga o le Faamanuia a le Kolisi Faafaifeau i Malua o lenei tausaga, na faauu ai A'oa'o ma Faletua e 34. O le sauniga sa ta'ita'i e le afioga Taitaifono Komiti o Malua, susuga Asotasi Gu Time FT, o le Tusi Paia sa faitauina e le susuga Faleulu Malaulau FT (Faatonu Niu Sila Saute), o talosaga na taitaiina e Aviti Etuale FT (Faatonu Vitoria). O le tatalo mo A'oa'o ma Faletua faau'u na saunia e le Failautusi Komiti Malua/Au Toeaina, susuga Amuia Seuala FT (Faatonu Itu o Tane). Sa faatumulia totonu o le malumalu i le paia o le Ekalesia, i Toeaina ma Faifeau ma Faletua, o le mamalu o matua, aiga ma paaga a le au faauu ma le Kolisi, le mamalu o le Malo i lana afioga i le Ao Mamalu o le Malo ma lana masiofo, le afioga i le Fono Sui Tofia, le afioga Sui Palemia, minisita ma faipule o le Palemene o Samoa. O le Peresetene o le Mafutaga A'oa'o ma Faletua, susuga Fialii Mafuolo AM na saunoa faafetai fai ma sui o le au faauu.

O le susuga i le Faifeau Pule, Dr. Vaitusi Nofoaiga FS na saunoa i le Lipoti Faaletausaga o galuega a le Kolisi. O le tausaga lona lua lenei talu ona faia le polokalame mo le faailoga o le Master of Theology. E to'a valu ua faamanuia i lenei tausaga; to'a 5 i le Master of Theology, ma le 3 mo le Master of Theology with Distinction. O le Fono Tele 2023 na filifilia ai se tasi o le afaigaluega Faiaoga, Dr. Taipisia Leilua FS e avea ma Failautusi Aoao o le Ekalesia. E to'a lua faiaoga ua valaaulia e Aulotu fai mo latou faifeau - o le Sui Pule ia Makesi Neemia FS ma le faletua ia Torise i le EFKS Sini Ausetalia, ma le susuga Olive Samuelu FS ma le faletua ia Maria i le EFKS Fogapoa. O le susuga Dr Arthur Wulf FS ua avea nei ma Sui Pule, faatasi ma le afaigaluega faiaoga to'a 11.

Na tauluga le lipoti a le Faifeau Fomai Pule ia Nofoaiga, i le faafetai a le Kolisi i vaega eseese o le Ekalesia - le Laulau a le Fono Tele, le Komiti Malua & Au Toeaina, matua ma aumeamamae a le Kolisi, ma le loaloa o le EFKS. Faafetai le lagolago malosi mo polokalame eseese a le Kolisi, e ala i talosaga ma tapuaiga, faatupe ma faaolua ua i'u manuia ai lenei tausaga. Ia manuia le faiga tuuaga. Manuia tele le Kerisimasi ma le Tausaga Fou. Ia i le Atua le viiga e faavavau.

FAAFETAI FAI TAULAGA

Tusi Faitau: Luke 17: 7 – 10

Matua: Luka 17: “9 E faafetai atu ea o ia i le auauna ina ua faia mea na fai atu ai? Ai lava e leai. 10 E faapea foi outou, pe a uma ona fai o mea uma na poloa’iina atu ia te outou, tou te fai ane, O auauna lē aogā i matou nei; auā o mea uma e tatau ona matou fai, o mea ia ua matou faia.”

O se fetalaiga faigata tele, ma se a’oa’oga e lavelave lenei a Iesu i le mataupu o le faafetai, pe a uma ona fai se galuega. Auā o lea ua a’oa’o Iesu, e leai se mea e tau faafetaia ai fua le galuega pe a uma ona fai. O le mea e ofo ai, ona e lē na o se tasi se feau sa fai; o le fai faatoaga e suatia le eleele, toe fai le lafu manu i le leoleoina o mamoe, o ni galuega mamafa tele. E lē gata i lena, a e a uma galuega i fafo, faapea e uma ai, ae leai; e faapoopo foi isi feau i totonu o le maota, i le gasesega o le tausiga a le matai. O le auaunaga e faasoloatoa, o le tautua amata mai le vave ao, seia oo i le leva o le po, aunoa se mapu, sina koma, po o se malolo. E tatau ai lava ma ua talafeagai se faafetai, se faamālō, se faamanuia. Peita’i, o lea ua a’oa’o mai Iesu i ona soo, *Ai lava e leai... O auauna lē aogā i tatou.*

Se a le uiga o lenei a’oa’oga faigata? Lenei mataupu ua atagia ai, peisea’i o le Alii ua lē alofa, ua pule sauā i lana aufaigaluega, ua faatauagavale i le tautua o ona tagata? Peitai, e ao ina tatou malamalama, o loo a’oa’o Iesu i ona soo, o le au aposetolo, i le tulaga o i latou o auauna, i le va feagai ma le Matai; ia latou malamalama lelei i lo latou va feagai, le va tapuia, le va fealoa’i ma le va fesootai; o i latou lava o auauna, e leai se taimi e ta’ua ai i latou o ni matai. Na o le tasi le Matai, o Iesu, o Ia le Ao, le Pule.

E lē gata i lena, a o i latou o auauna, ua valaauina e tala’i le Tala Lelei. O lena valaauina, o se faamanuiaga e lē maua gofie e soo se tagata. Pe faapea foi, o se matū palapala, a o se igagatō, e ui ina latou te lē agavaa ma talafeagai, a ua filifilia lava. O le valaau mai le alofa tunoa o le Atua. O le mea lea, soo se feau latou te faia, itiiti pe tele, e tusa ma lo latou tiute faa-aposetolo, ua uma ona i ai le faafetai, ua i ai faatasi le faamalo, ma le faamanuia a le Atua, o Ia e ana le alofa tunoa uma

Aemaise foi, o le malosi e mafai ai ona faia e le auauna ana feau, o le malosi o le faatuatua; faatuatua i le mana ma le pule, le tamaoaiga i tupe ma oloa, e foai mai e le Matai. Lona uiga, o mea uma ua mafai ona tino mai ai le galuega a le auauna, o mea lava na aumai e le Matai. E tatau ai ona faapea ane le auauna, O auauna lē aogā i matou nei, a e o le faafetai, ma le viiga, ma le faamanū, e ao ona faafoi atu i le Alii le Atua. Amuia se auauna na te lagona lona faatauavaa i luma o le Atua, o le ā le tele o sana taulaga.

Le paia o le Pulega, susū lau susuga i le Toeaina ma le Failautusi, o faafeagaiga taulagi i le nofo a Aulotu, susuga i A’oa’o ma afioga i Tiakono, o itutino eseese ma le loaloa o la tatou Pulega. Ua malo le fai taulaga i lenei foi tausaga. Faafetai le foa’i, malo le ma’au, faafetai le faapolopolo ma le faamuamua i le Atua ma lana galuega. Ua outou lē tuua ni lelei ae aumai ni masei. A ua outou sasa’a faaoti le utu a le faimea, ona o lo outou silasila i le Atua ma lana galuega. E ui lava ina faigatā le a’oa’oga a lo tatou Alii o Iesu, e peisea’i o le a leai se faafetai i le faiga taulaga tele ua uma ona faia, a e leai. ‘Aua le popole, ‘aua le masalosalo. O loo manino lava le finagalo malie o lo tatou Alii o Iesu, i lau taulaga ua faia ma le loto fiafia, loto malie ma le loto faatuatua. E leai sina matāua o lou afu sisina, e lilo i lana silafaga ati; ma e lē aunoa foi ona la toe faatutumu ma toe tauia mai, e faamanuia mai i ana auala mamana eseese. O upu masani, E tupu mea aveā, a e ‘elea mea teu pea. A o la le aposetolo, “E lē se mea faalēaogā lo outou tautiga... E sili le manuia o lē na te foai atu, i lo le na te talia mai.”

O lena ua nofo fale i finagalo, o faiga taulaga e lē o se sailiga o ni manuia, poo le su’ega o ni vi’iga o se tagata. E le o se mea e faamallosia. Ae faia i le loto fuatiaifo lelei, e faatino ai la tatou faafetai lē ‘a’u’a’u, i le Taulaga Sili, le taulaga e Tasi a e Afe, na faia e le Atua i lona alofa, e ala i Lona Alo pele e toatasi o Iesu Keriso, na faatautauina i luga o le satauro, ina ia faaola ma faamagalo i tatou, ma tatou maua ai le ola faavavau. Faafetai le EFKS fai taulaga i le Atua.

Tau ina ia alofa le Atua faamanuia ma ta’ita’i feau o totoe o lenei tausaga. Faafualoa ma faapaia lo outou soifua faatuatua, ma ia aulia le Kerisimasi i le Fiafia, ma se Tausaga Fou Manuia. Ia i le Atua le viiga e faavavau. Amene.

(Laugaina: Gago Faaletatau, Taelefaga)

O LE PEROFETA MULIMULI

(O le Tala Faasolo ua faaSamoaia mai le tusi, 'The Last Oracle' tusia e James Rollins)

O autafa o le fale na tutupu a'e ai le vao e gata i le sulugatiti. O foliga ma vaaiga e atagia ai le umi o se taimi e le'i nofo se tasi iinei. E tasi le faamalama, ma ona puni faamalama sa tapuni mai totonu. Na iloa atu e Monike se tama'i uafu i le isi itu, sa le'i i ai se vaa na taula ai. Peitai o se vaa mafolafola – se vaalaau e maai lona taumua – sa tulei atu i totonu o se pupuvao. Na ufitia le 'afa o le vaalaau e limulimu, a e talosia o loo lelei pea.

Na toe foi atu Monike i le pito i luma o le fale. Na ia taumafai e tatala le faitotoa. Sa le'i lokaina, peitai o laupapa sa patupatua, ma sa manaomia se taumafaiga malosi e tulei tatala ai a o 'o'i'o'i faanifo ua 'elea. Na pogisa totonu ma namuasua. A o le mea sili sa mago. Na o le tasi le potu o le fale. O le fola sa fai i le paina, paepae solo ai vao. Na pau le meafale sa i ai o se tamai laulau ma ni nofoa se fa. Na faalalava ai kapeneta i autafa atoa o le tasi puipui, a e sa leai se umukuka. E foliga mai o gasesega uma sa faia i le ta'inafi, na faaputuputu ai i autafa o falai ma ulo. Na iloa e Monike se faaputuga alala o laau mamago.

Ua lava lelei lea.

Na laa atu Monike i le fasitepu ma tālo atu i tamaiti e o mai i totonu.

Na te le'i mana'o e faatali, peitai na latou mana'omia sina malolo teisi. O le tapuni ai o faamalama na faia ai e Monike se afi. E lelei e faamamago ai o latou ofu ma seevae, ma faamafanafana ai i le po malulu. Pe a maua se malologa ma toe mago lavalava, e mafai ona ala usupō i le vaveao, faamoemoe e fa'aaoga le vaalaau.

Na fesoasoani Konesetativo i le faaolaina o le afi, a o nofononofo tamaiti e toalua i luga o le fola ma faalagolago ia Marata. Na maua e le tama matua se afitusi, ma na vave ona talalī laau mamago, ma pupusa a'e ai le asu i luga o le alaasu.

A o tuu atu e Monike nisi fafie i le afi, o Konesetativo na tasu'e solo i kapoti. Na maua ai ni mea fagota, o se mōlitū sa i ai sina karasini itiiti, o se tamai naifi ma se pusa o ututau. A e leai se fana. I totonu o se tasi kapoti, na ia maua ai ni nusipepa taataai lanu samasama, sa i ai ata o ni tamaitai telenoa, o pepa na fao e Monike ma

na teua faalelei. A o luga o fata, sa i ai ni taaiga 'ie solo mamafa se fa sa gaugau ma faaputu faalelei.

A o tuu atu e Konesetativo faaputuga o ie, na ia faasino atu ia Monike lana ato na taatia ese. Na tilotilo atu Monike i ai. Na faasino e le tama lana masini fua vevela o kasa. Ua le o toe pa'epa'e, ua i ai nei ni faailoilo lanu piniki.

"O faavevela," na memumemu ane ai Monike.

Sa lue atu le ulu o Konesetativo. "O le fale ma afi o kasa oona na faa-oona ai le Vai o Karakei." Na ia faasino atu i le itu i matu sasa'e. "Na magoto lemu ifo foi i lalo i le palapala."

Na ia faaona faaleaga le vai i lalo i totonu o le elelee, na iloa lelei e Monike. A o fea na i'u i ai le tafega uma mai luga o mauga o le lotoifale?

Na lulu lona ulu.

Ma na mafaufau ane pau le mea sa mua ona popole i ai, o taika e aina tagata.

7.04 afiafi.

Na nofo faasausau Piota, faapupu'u ma pulupulu i se taaiga ie mafafā i luma o le afi. O latou seevae sa laina faasolosolo i luga o le ogaumu, a o latou ofu sa tautau e faamamago i le manoa fagota. O le sautuaiti o le manoa sa pei ai ona ofu o loo faaopeopea i luga o le vateatea.

Na ia fiafia i le vaavaai atu i le fe'emo'emoa'i o le afi i lona talalī ma sivasiva, a e sa ia le'i fiafia i le asu. Na pusa faataamilo a'e i luga o le alaasu e pei o se mea o loo ola, o se mea na fanau mai totonu o le afi.

Na ia gatete ma feminoia'i solo i lona papatua faalatalata i le afi ma lona pupula manaia.

O le tamaita'i sa vaaia i latou i le a'oga sa masani ona ia faamatala ni tala e uiga i le faataulaitu o Papa Iaga, sa nofo i le togavao pogisa i se fale laau, na fealua'i solo i ona vae moa e su'e tamaiti e tali ai lana sua. Na mafaufau Piota i pou taofi na ia vaaia i fafo, na taofiofi ai lo latou fale laau. E faapefea pe afai o le fale laau lenei o le faataulaitu, o loo lafi ma ona mati'u'u i totonu o le elelee?

Na ia vaavaai atili atu i le asu ma ona mata ua masalosalo.

A e mata e lē o i ai ni auauna a le faataulaitu o loo lalafi e fesoasoani ia te ia?

Na ia vaavaai solo pe iloa atu nisi. Na te le'i iloa atu se mea po o se isi na minoi, ese mai le sivasiva solo o ataata o aloiafi. Sa faigata ona iloa.

Na ia faalatalata atili atu i le mafanafana vevela o le afi. Sa taula'i pea lana vaai i le feminoia'i o le asu.

Na ia faalue solo e faamautinoa o loo ia sagatonu. Na alu ane Marata ma nofo i ona autafa ma opoopo atu o ia. Na ia faalagolago atu i ai. Na pa'i ane se lima malosi ma toso atili atu o ia.

Aua e te fefe.

Peitai o ia sa fefe. Na ia lagonaina le mageso mai totonu o lona atigipoo e pei o ni apogaleveleve se afe o loo valualu ai. Na ia matamata pea i le asu, ma lona iloa o iina o loo i ai le tulaga mata'utia e lamatia ai, o le asu o loo ia logoina le taulaitu o Papa Iaga o loo i ai tamaiti i totonu o le fale.

Na tātā saosaoa malosi le fatu o Piota.

O loo sau nei le taulaitu.

Na ia iloa manino.

O ona mata sa faataupupula faalautele i le asu.

Na ia saili mo le mea mata'utia.

Na ū ū atu Marata i lona taliga, e faalototele ma faamautinoa peitai sa le'i i ai se aogā. O loo sau nei le faataulaitu e 'aina i latou. O loo lamatia lo latou ola. O tamaiti ua lamatia. Na pa'ō mai le afi, ma sa ia oso tu a'e i luga i le te'i ma le fefe. Ona ia iloa ai lea.

E le o tamaiti. A e o le tamaitiiti.

Ma e lē o latou. A o le isi.

Na faatau pupula malosi Piota i le asu, a o tau tulei ui atu i le pogisa i le mea moni. A o faataali'oli'o a'e le asu i le vanilonilo, na ia vaai le tagata sa lamatia.

O lona tuafafine. O Sasa.

11:07 taeao

Uosigitone.

“T.F.F.T.,” na faamatala atu ai e Lisa i autafa o le moega o le teine.

Sa taumafai malosi Kati e fia malamalama. Sa ia tu ma ona lima fusi mau i ona autafa a o ia pulato'a ifo i le tino mosimosi o le teineitiiti, e matuā pa'e'e ona ivi e iloa atu i lona ofu falema'i, tau leiloa atu i ieafu ma aluga o le moega. Sa tata'i

atu uaea mai lalo o ona ieafu e tau atu i masini o pipii i se tasi puipui, o faatonutonu ai le maualuga o le toto ma le tā tā o le fatu. O se tasi faagaau fua toto sa tulutulu ifo ai vailaau ma vai masima. Ui i lea, i itula ua te'a, o lona tino sa pei e pula na faasolo ina lanu efuefu, o ona laugutu pei e lanu moana.

“Toto Faamalō Faasalalauina Totonu,” sa faaliliu atu ai e Lisa, e ui ina sa pei lava o loo ia faa Latina.

O Monike, i lona a'oa'oina faafomai, mata na te silafia le mataupu sa faamatala ane e Lisa. Na luelue ese e Kati le mafaufauga mulimuli lea mai lona ulu, o loo mamafa pea ia te ia le ata na tusi e le teine lea sa ia vaai i ai. Na manino lava lona tusia o lea ata mo Kati. Ua la fausia se sootaga. Na vaaia e Kati i mata o le teine a o ia faitau atu ia te ia. Sa mafuli le amio a le teine i le mafolafola ma aafia, a e o nisi taimi e faatetepa ane ai ona mata laiti ia Kati. Sa i ai se mea na pupula mai ai, o se paluga o le talitonu ma toetoe ina aloaia. Na liu suavaia ai le fatu o Kati. A o i ai sana ia pepe fou, na ia iloa lelei ona lagona faaletina ma ona omoni faaosofia le malolosi, o ona faalogona sa ma'ati'ati i le aveesea talu ai nei o lana tane.

“Se a le uiga o lena mea?” na fesili atu ai Penita ia Lisa.

Na tu o ia i le itu faafeagai o le moega i autafa o Lisa. Faatoa foi mai o ia i le taliga o se valaau mai ia Karai o i Initia. Sa osofaia la latou vaega ma ua agai atu nei i le itu i matu. Ua amata ona fai sutesuega a Penita po o ai na faatonuina le osofaiga – le taupulega e tagatavaleina le polofesa e le o se mea ona pau ua fetau tonu, o se isi na iloa o loo malaga atu Karai. E ui ina sa ia fia tuliloa atili le misiterio, a e na faa-avanoa le taimi o le polofesa e sau iinei e fia faalogo i le lipoti a Lisa.

Ua uma se su'esu'ega o le toto a Dr. Kumiga.

E le'i talia le fesili a Penita, a e ulufale mai Dr. Seana Makenaiti i le potu. Ua aveese lona peleue ma le fusiua. Ua afe foi i luga lima o lona ofutino. Na ia alu e fai ana telefoni ina ua uma talanoaga ma Karai. Na faasaga atu Penita ia te ia, faaputele ona mata i le tau fesili atu, a e sa na o le talo atu o le lima o Seana ia Lisa e fa'auau. Na ia faagoto ifo i se nofoa autafa o le moega. Sa ia leoleo ai iina mo le itula ua te'a. O le taimi nei ua malolo

atu lona lima i luga o le ieafu. O Kati ma Seana ua fai si umi o talanoa. E i ai ana fanau a fanau e toalua.

Na faalaulelei e Lisa lona fa'a'i. "O le TFFT o se faagasologa o togafitiga e amata ai ona fausia alualu toto mafiafia i totonu o vaega eseese o le tino o le tagata. E faaitiitia le malosi o le toto e tafe solo i alatoto, ma e i'u atu ai i le piliki i totonu. E eseese lava mafuaaga, a e masani lava le amata ai o se gasegase itiiti ae faasolo atu i se ma'i ogaoga. O le u a le gata, kanesa, mu, ma le te'i. A o se tasi o mafuaaga taatele o le fula. Fula pe fefete le fai'ai. O le mea lena a oso le fiva ma..."

Na faasino atu Lisa i le masini o loo faapipii atu i le atigipoo o le tamaitiiti. Na faamanifinifi ona laugutu i le popole. "O saililiga ma su'esu'ega uma na faamaonia le ma'i. Ua faaitiitia le malosi o le toto, ua siitia le lamatia, ma faateleina o le umi o le taimi e piliki ai. Ua ou talitonu ma le mautinoa i le su'esu'ega. Ua ou taofia o ia i le afaina o lona toto, ma o loo fafaga lona toto ma tui i ai vailaau. E fesoasoani e taofiofi ma faato'a ai o ia i le taimi nei, a o le togafitiga autu lava e aga'i tonu i le ma'i ma le siama na faaosoina le TFFT. Ma o le mea lena o loo le iloa pea. E le o i ai o ia i se tulaga ua lē toe aogā togafitiga. O lona toto ma isi vaega uma o loo i se tulaga vaivai. Atonu o se siama pisia, a e o loo o'u mafaufau e i ai se isi mea o loo tupu, o se mea o tatou pogisa i ai, o se mea e fesootei i le mea na totō i totonu o lona fai'ai."

Na to le mānavanava loloa a Kati. "Ma a aunoa ma le silafia o lena..."

Na piilima Lisa e pei foi o le tu a Kati. "O loo faasolo ina vaivai. Ua ou faasolosolo faatuai o ia, peitai e tatau ona tatou iloa nisi mea e sili atu. O mataitusi na – TFFT - e i ai le isi ona faaumi i le gagana faafoma'i. O lona uiga, Tau Faatali Feiloai ma le Tuugamau."

Na faliu atu Kati ia Penita. "E tatau ona fai se tatou gaioiga."

Na ia lue lona ulu ma vaai atu ia Seana. "E leai se isi a tatou filifiliga. Tatou te manaomia ni tali. Atonu e lava le taimi tatou te aumaia ma fesiligia ai le vaega su'e toto, a e o loo i ai nisi tagata taitoatasi e sili atu lo latou iloa, o loo o gatasi lo

latou silafia ma le atamai paiolo faatekonolosi faaonaponei, ma latou silafia le mea tonu na fai i lenei teineitiiti."

Na mapuea Seana. "E ao ina tatou faagasolo ma le faautauta, faateete."

Na maitau atu e Kati ua uma se talanoaga i le va o Seana ma Penita. "O le a la oulua tonu?"

11.38 po.

Na laa atu Tereni Makepalai i le alatele umi o le fale. O le vaega lenei o le maota Ualeta Riti ua manaomia vave se toe faafouga. O potu falema'i i ona itu uma e lua na malepelepe, o puipui sa maanuminumi, ta'eta'ei palasa, peitai o lona sini e fia oo i ai o le vaega o ma'i faalemafaufau sa loka i le pito i tua. O puipui iinei sa fausia i poloka simā, e loka faamalamalama, o faitotoa uamea sa loka i filifili laiti.

Na kolosi atu Tereni i le sela mulimuli. Sa tu ai le leoleo i fafo o le faitotoa. Latou te le'i faatamala e tuu se avanoa.

Na sitepu ese le leoleo ma tuu atu ia Tereni se fuifui ki.

Na ia tago atu i ai ma siaki atu lana vaai i se tamai faamalamalama i le faitotoa. Na taoto faaloloa Iuri ua la'ei i luga o le moega. Na tatala e Tereni le faitotoa, ae nofo a'e i luga Iuri. Mo se toeaina matua, sa malosi ma tiotio, faailoga manino o loo inumia ana vailaau faatupu malosi ma puipui hormone 'aua ne'i matutua. O nei Rusia fiafia tele i fualaau faatumau ai le talavou.

Na ia tulei faalatele le faitotoa. "Ua oo i le taimi ta te o ai, Iuri."

Na tu a'e i luga le tamaloa ma ona mata pupula malosi. "Ia Sasa?"

"O le a ta'ua iloa lava."

Na kolosi atu Iuri i le faitotoa. Sa le'i fiafia Tereni i le pupula to'a o foliga o le tamaloa ma sa amata ai lona masalosalo. Sa le'i pei o se tagata ua toilalo, a e o Iuri sa i ai le tulaga pei se u'amea, pei se lau o se agaese na tu'itu'i, faama'ai ma fausia ia lelei ma anagatā. Atonu o le malosi o le tamaloa sa le'i auala uma mai i tui sa fai i lona nofoi.

Peitai, pe malosi pe leai, o Iuri lava ua i lalo o lona lima matua.

Ui i lea, sa talo atu Tereni i le leoleo ina ia mulimuli atu ia te i la'ua ma lana auupega i ona

autafa. O le fuafuaga a Tereni la te toe savavali mai ma Iuri na o la'ua. O lona maualuga sili atu ma le ono futu ma e faaluaina le mamafa o le tamaloa, sa le'i popole o ia i se leoleo po o se faafeao. Peitai sa ia le'i talitonuina le pupula na iloa atu i mata ma foliga o Iuri.

Na latou o atu i fafo.

“O fea a tatou o i ai?” na fesili atu ai Iuri.

Ina ia tutu'i le fao mulimuli i le pusaoti o Atipale Poleki, na ia tali lemu atu ai. Na tapena uma e Tereni le maliu o lana uo matua, a o lenei ua ia faamoemoe e tuu loa le muta'aga i se tasi o su'esu'ega manuia le susulu a Atipale, o lana tamaitiiti-fai'ai, o se faalapotopotoga faalilolilo na moemiti i ai le tamaloa a o ia tautua ma auauna i le au Iasoni.

O se 'au vaega o saienitisi fasioti tagata.

O Iasoni e i ai ma laau malosi.

Peitai o le mae'a ai o le fasiotia o le polofesa, ua tatau nei loa ia Tereni ona faatama'ia le tamaitiiti-fai'ai a le tamaloa. Ina ia alualu pea i luma lana ia lava galuega, ua tatau ai ona fasioti loa Sigima.

6 Setema, 7.36 afiafi.

Punatapu, Initia.

A o goto malie ifo le la i le tafailagi, na ta'utino e Karai le atamai o le filifiliga e Rosauero o le taavale na latou malaga ai. O le nofoa o le pasese na ia nofo ai ma lona alofilima na pipii mau i le fale o le taavale, a o salutulutu atu i le auala omoomo ma palapala. Na latou tuua le aai tulaga lelei mulimuli i le itula talu ai ma latou tauasa atu ai i atu mauga i tua o aai.

O lafu manu, faatoaga suka ma togalaau mago na vaevaeina ai laufanua i vaega taitasi. Na faamatala e Matesone o Punatapu o le atofalaoa lea a Initia ua lava saunia, o le Karanari o Initia, i lana faamatalaga faatusa, na maua mai ai le tele o le saito, falaoamata ma le araisa.

“Ma e i ai se tasi na te galueaina nei faatoaga,” na fai atu ai Matesone a o ia faatonutonu atu le malaga mai le nofoa i tua.

Na latou nonofo faatasi ma Kousalasaki ma Elisapeta. O latou tua atu na nofo ai Luka ma polesi ana agaese.

“Liliu atu i le isi itu agavale,” na faatonu atu ai Matesone.

Na mimilo e Rosauero le foeuli, ma patatu ai le taavale i se vaivai 'omo toeitiiti a pei o se alia. Na toulu ifo i ai nai uaga a o alu le malaga i luga nei. O Punatapu o le faa-Peresia mo le “laueleele o vaitafe e lima,” o le mafuaaga lea ua fai ai ma fanua o faatoaga autu o Initia.

Na siaki e Karai le vanimonimo i le tauafiafi a o faasolo mai le pogisa. Na feoa'i maualalo ao o le lagi. E tele ni timuga latou te fetai'a i a e le'i ao.

“O luma atu,” fai atu ai Matesone. “Tala atu o le isi mauga.”

Na a'e a'e atu le taavale i luga o le a'ega palapala. I luga atu o le a'ega, na taatia mai ai se vanu pei se ipu faa'ofu'ofu itiiti, faataamilo ai ni mauga. Na taatia mai ai se nuu pogisa i lona pito i lalo, o se faaputuga o fale fausia i maa e ato i launiu. Na mumu a'e ni afi itiiti sa tafu i le taufaasi'usi'uga o le aai, o afi sa talali i le sa'euga e tamaloloa na tutu ai ma a latou amouumi. O le susunuina o otaota. Na tu ai se taavale toso e povi i autafa o se tasi tafuna'i, o tumu i otaota. Na feminoia'i le povi e tasi lona seu ina ua ifo atu la latou taavale i lalo o le a'ega.

“O le isi itu o Initia,” fai atu ai Matesone. “E sili atu ma le tolu kuata o le faitau aofai o Initia o loo nonofo pea i nuu i tua. A o iinei o loo i ai i latou i le pito i lalo o le sosaiete faakasa. O le Hariana, e pei ona sa toe faaigoa ai i latou e Kani, o lona uiga 'o tagata o le Atua,' peitai e mafulu lava ina faatauemua o talita po o akuta, o lona uiga pe a faaliliu, o tagata e le matagofia”

Na maitau atu e Karai, o Luka ua toe sulu ana agaese ma ua faalologo ane ona taliga. Lematagofia. O aa o nei tagata e pei o lona foi tupuaga.

“O ai nei tagata?” na fesili atu ai Karai, i lona manao e fia iloa atili i latou nei a latou fesagai.

“Ina ia tali lau fesili lena,” o Matesone lea, “e ao ona e malamalama lelei i le faiga faatulagaina faailoga lanu a Initia. O talatuu e faapea o varana autu uma – po o ituaiga vasega o tagata - na tutupu a'e i se tagata pei se atua. O le au Paramana, e aofia ai faifeau ma faiaoga, na tutupu a'e i le gutu o lenei atua tagata. O ta'ita'i ma fitafita na tupuga mai i ona lima. O tagata folau ma faatau oloa sa mai ona ogavae. O vae na tupuga mai ai pologa ma auauna. E tofu le itutino ma ona ituaiga na maua mai ai ona faasologa, o le tele lava sa faatulaga i le faaputuga tala e lua afe tausaga e ta'ua o le Tulafono a Manu, o loo auiliili mai ai mea e te faia ma mea e le mafai ona e faia.”

(sosoo atu Sulu Samoa Tesema 2023)

NA O AFIOGA E TULEI MAI FOFOGA O LE ALII

‘AUALE FAATAUTAVĀ & ‘AUALE FAATUSATUSA

“¹¹E matuā galue foi na mea uma e lea lava Agaga e tasi, o loo o tufatufa i tagata ia taitasi ma lana mea, pei ona finagalo i ai o ia.” 1 Kori.12.

E lē o faamatalaina lava le Ekalesia i se tulaga e pei o se faatemokalasi i totonu o le Tusi Paia. O le upu moni, e tataua ona tutusa le faiga o tagata uma i le tulaga o le agalelei, alofa ma le fa’aaloaloga; peitai e pei ona eseese a tatou feau ua tuuina mai e le Atua, e faapena foi ona eseese a tatou meaalofa mai ia te Ia. *“¹¹E matuā galue foi na mea uma e lea lava Agaga e tasi, o loo o tufatufa i tagata ia taitasi ma lana mea, **pei ona finagalo i ai o ia.**”* O le uiga o upu o loo **faamamafa:** E na o le Atua e toatasi na te filifilia le taleni, agavaa, tofi ma le tiute, a tagata taitoatasi. E manana’o matua uma ina ia manuia a latou fanau i lenei olaga. Peitai e ao foi ona latou silafia, e pei ona tofi le tamaitiiti ma le taleni faapitoa ia te ia, e faapena foi ona tulaga ese o latou taunuuga taitasi. O le mafuaaga lena e sesē ai lou faatauvā pe faatusatusa i se isi tagata. Fai mai le afioga a le Atua i le Eperu 2, *“⁴Ua molimau mai foi le Atua faatasi ma i latou i faailoga ma vavega, i mea mamana eseese foi, ma mea alofa mai le Agaga Paia, e tusa ma lona lava finagalo.”* Ia ‘aua lava nei e fesiligia pe faaluafesasi lou manatu i le Atua; na te silafia lelei le mea o loo Ia faia, ma e lē mafai ona Ia faia se mea sesē pe faalētonu. E oo lava foi i lona ausoo e sefulu ma le lua, sa i ai lana li’o ogatotonu. Na Ia ave Peteru, Iakopo ma Ioane i luga o le Mauga na Liliueseina ai, a e auina atu isi i le aai e galulue. Na te le’i saisaitia pe faamalosia e aveina a’e i latou uma i luga o le mauga ne’i i ai se tasi e afaina pe faamanu’alia sona manatu. Pe mata la o lona uiga ua sili atu lona alofa i nisi nai lo isi? E leai. O le a’oa’oga mo Peteru Iakopo ma Ioane na latou maua i luga o le mauga i lena aso, o se vaega o lo latou tapenaga mo le feau na valaauina ai i latou e Iesu. Ma e i ai se a’oa’oga iinei. E ao ona e minoi i luma atu o manatu o isi tagata. Na fausia oe e le Atua mo se feau faapitoa; e i ai se galuega ua Ia finagalo ai mo oe, e leai se

isi tagata na te mafai ona faia lelei e pei o oe. Pe afai e te iloa ua i ai se mea ua fetau lelei ma ua talafeagai i ai lou agavaa, ona fai loa lea ma faatuatua i le Atua o le a Ia faamaonia oe i luma o mata o isi tagata.

‘AUALE TAUFETOI & LIMAIMA’A

“²⁵Ua latou lepetia aai, ua taitasi foi ma lafo e tagata uma lana maa i fanua lelei uma, ua tutumu ai, ua latou tatanu vaipuna uma..ua faataamilo i ai le ‘au a maatā, ma faataugā i ai.”

I taimi o le Feagaiga Tuai, o tagata ‘taufetogi’ po o tagata ‘lima i ma’a’, o i latou ia sa latou faatoilaloina ma fafasi isi tagata e ala i le tau’ai i maa, ma latou faatutumu foi totonu o latou vai’eli i maa ma palapala – o vai’eli e asu ma maua mai ai vai, o se mea manaomia tele mo le ola o aso taitasi. O aso nei, ua tele ituaiga tagata taufetogi, ma auala eseese ua faatino ai le taufetogi - ua lē na o maa ma palapala, a ua faasino i upu ma tala fela’ua’i solo i luga o aga fesootai faonaponei. Ma atonu foi ua e lavea ma ua e manu’a i maa o upu faifai ma tala taufaaleaga, sa fetogia ai oe e nisi tagata. Mata o loo e feagai foi i le taimi nei ma se fetau’iga o maa e ala i le fela’uaiga o upu ma tala, o tuuaiga ma faamasinosinoa’i; pe afai o lena, o le a se mea e ao ona e fai? O se tuualalo ma se fautuaga, ia ‘alofia lou faatasi atu i ai, ‘alo ese mai ia i latou na, o tagata mata’utia i latou. E lē mafai ona fai se fagatuaga i le palapala e aunoa ma lou palapalā ai. E lē gata ina e manumalo lou fili, a o le a ia maua se fiafiaga tele tuufaafegai ma lou manu’a ma le faanoanoa. Ina ua avea ai oe ma tagata taufetogi, e ao ona faamanatu ia te oe le afioga a le Atua mai ia Isaia 58, *“⁹Ona e valaau lea, a e tali mai ai le Alii; e te alaga atu, a e fetalai mai o ia, O a’u lenei; pe afai e te faate’aeseina le amo ia te outou, **o le tusi o le lima, ma le upu vale.**”* ¹⁰Afai foi e te alofa atu i le ua fia’ai, ma e fafaga ia maona o le ua tiga; ona alu a’e lea o lou malamalama i le pouliuli, ma lou pogisa e pei o le aoauli ia. ¹¹E ta’ita’iina foi oe e le aunoa e le Alii; e faamalie foi o ia ia te oe pe a oge vai, ma faamalosia ou ivi; e avea foi oe e pei se fanua ua faasūsūina, e pei o le punavai foi e le mate ona suavai.”

O loo i ai se afi'i o faamanuiaga iinei e talafeagai lelei mo i tatou i lo tatou taumafai faamalolosi e galulue ma tausisi i ai. O le mea lea ia leoleo lelei ou manatu auā e avea lena e fai ma au upu ma tala e pa'u atu i lou fofoga. Ia leoleo au upu auā e fai lena ma au gaoiga. Ia leoleo au gaoiga auā e fai lena ma au amio. Ma ia leoleo lau amio auā na te fuafuaina le laasaga o faamanuiaga a le Atua i lou olaga. O le mea lea e tāua ai le afioga a le Atua ua faamanatu mai – ia 'aue ne'i taufetogi pe limaima'a!

O LE ALE TAULAGA UA TATAU?

"Ina fai taulaga ia i taulaga tatau." Sala 4:5

O loo manino a'oa'oga a le Tusi Paia faasino i taulaga ma lona osiga i le faatinoga ma lona faiga, aemaise le agaga e fai ai, o le fua e iloa ai taulaga ua lelei, taulaga e talafeagai, e manogi ma matagofie i luma o le Atua. A o nai motuga'afa e tusa ma lena foi masina sa alofaiva i ai le EFKS i ana faiga taulaga, a o se tapenaga mo lena foi tausaga, aua o le galuega e fai fai pea.

1. O le mea muamua lava e iloa ai le taulaga tatau, **o le taulaga lea ua fai** - ua lafo ma ua faataunuu. E toatele nisi e masani na o le talanoa i faiga taulaga, ina ia lagona mai e isi; e manatunatu ma mafaufau i ai ma oo lava ina tatalo ai, e fai foi ma mafuaaga o talosaga mo nogatupe ma tupe lafo mai aiga, a e uma ane e leai se taulaga e tino mai. Ua iloa, ua tautala ai, a e le faia; o le agasala lena. *"17 O lena, o le ua iloa e fai le mea lelei, a e le faia, o le agasala lea ia te ia."*Iako 4.

2. E i ai le eseesega o le taulaga e itiiti ma le taulaga ua tele, i le aofaiga o tino i tupe. E telē atu le \$1,000 nai lo le \$100; e tele foi galuega e mafai ona fai i le \$10,000 nai lo mea e gafatia e le \$1,000. O le uiga o lea faatusatusaga, e i ai le tāua o le aofa'i o le taulaga; **o le telē o le faitauga, o le lelei foi lena.** Ua tele ina fai ane nisi o le a lava le itiiti o le mea e maua, a e a fai ma le loto malie, o le taulaga lelei lena. Mata o se faanoi e ufiufi ai le faapalapala ma faavaivai e saili mea tetele mo le Alii, a e ua lava na o sina mea itiiti. O taulaga sa osi i manu, sa susunu i fafie ia mu, ia alu a'e ai le manogi lelei i le Alii.

O aso nei, o taulaga e fia silasila i ai le Alii, o tatou loto ia. A o a tatou tupe ma oloa, ua faatusa i fafie e tafu ma susunu ai taulaga, ma o le tele o fafie, o le mu lelei foi lena ma le manogi lelei o le loto ma le agaga faafetai e silasila i ai le Atua.

Ua maitauina i lena tausaga lou soifua tausili mo le Atua ma lana galuega, o loo si'isi'i pea i luga. O aiga ma Aulotu ua siitia ma ausia le faitau afe, sefulu afe, selau afe, a o Pulega ua ausia le faitau miliona mo le uluai taimi. Peitai e maitauina foi, o le a oo atu nisi Matagaluega i le 5 miliona, a e le'i ausia lava e nisi la latou ulua'i miliona. Ui i lea, o le tuufaatasiga o lou soifua fai taulaga EFKS i tausaga taitasi, e tulaga ese e le mafaatusalia i nisi ituaiga i Samoa ma fafo foi. O le tele o fuainumera, o le tele foi lea o le viiga e siitia mo le Alii o fai i ai au taulaga.

3. **Ia lava le taimi e tapena mamao ma fuafua lelei ai lau taulaga,** ma ia faatulaga lelei se aofaiga o le a tulimata'i, a e 'aue le taumate. O le tapenaga a Aperamo ma lona atalii o Isaako (Kene.22), o loo atagia ai le tapenaga o le taulaga a le Atua mo le faaolaina o le lalolagi atoa - o le auina mai lea o lona Alo pele e toatasi, e osi ai le taulaga mo le faamagaloina o agasala. O se taulaga ma lona tapenaga sa faitau ta'i 14 x 3 auga tupulagā lona fausaga (Mata 1:17). O le va o laina i nisi o fuaitau faasino i taimi, o ituaso, ma itulagi, *"Ona ala tula'i lea o Aperamo i le taeao...ua oo i le aso tolu...ma ua iloa lea mea a e mamao..."* o loo faailo mai ai, le finagalo paia o le Atua mai le amataga, o le auala o le a faia ai lana faaolataga mo le lalolagi.

Pe a tala atu foi i tua i le faatoaga i Etena na fai ai tofiga, ma faailo ai le tama na te tu'imomomo le ulu o le gata, ona iloa lea o le mamao mamao tele lava o le tapenaga na fai a le Atua. O valoaga i le Mesia na totogo a'e i totonu o le Tafeaga, ua o se vaega toe lalaga faamanatu o le faamoemoe na foafoaina mai lava i le amataga. Na ta'u loa le tama e fanau, ma le atalii e foa'iina mai e i lona ua le malo, sa le'i toe liliu ese pe faaluafesasi le finagalo o le Atua, i le aofai o Lana taulaga o le a fai. O se fua lelei lea, ina ua amata atu i le faai'uga o le tasi faiga taulaga, le aofa'i o le a tulimata'i ia ausia, mo lena foi tausaga pe a aulia. **Taulaga ia a e le tusa ai, Iesu i lou alofa mai, Tau o se mea e iloga ai, O lo'u matua faafetai.**

O E UA FAI I LAGI FOLAUGA

TEROA VAALELE

1/5/1952 - 13/6/2023 (71+1+13)

O le tamā matua ia Teroa o se itu tino moni lava o lenei ekalesia, EFKS Lauili. Na soifua mai o ia i le Aso Tofi 1/5/52 a e na valaau le Atua ma faamanava ana feau i le Aso Lua 13/06/2023 ina ua 71 tausaga, 1 le masina ma 13 aso, o le matua o lona soifua. O ona toe sauniga sa faia lava i le malumalu o le Ekalesia i Lauili i le aso 28/06/2023. Sa molimau lona uso ia Tuautu Malo ma le Tamaitai ia Leafaitulagi le tama a lona tuafafine sa o latou mafuta, ma ta'ua ai o se tagata agamalu ma loto maulalo, a e sa fa'aautū le molimau ma le feau faaleagaga i le manatu e faapea “*ua toe foi i lona aiga.*” O a'u lava na ta'ita'i i ona sauniga i le tuugamau, ma faatofa atu ai i le pese faatofa a le au Kerisiano. Manuia lau malaga tamā.

Saunia susuga Pita Toleafoa FS

EFKS Lauili

Matagaluega Vaimauga

SINA AILEPATA SUA

TUIALII FAOFUA

(2/7/1961 - 16/8/2023 (62+1+15))

O le faletua o le tiakono ia Sina Ailepata na soifua mai le Aso Sa 2/7/1961 a e na faamanava e le Atua ana feau i le Aso Lulu 16/08/2023, i le Falemai o Royal Melbourne Hospital i Melepone Ausetalia. Ua 62 tausaga, 1 le masina ma le 15 aso le matua o lona soifua. Na taunuu mai lona tino maliu i Samoa i le aso 29/08/2023. Ma o ona toe sauniga sa faia lava i le ekalesia i Lauili i le aso 8/9/2023. O le Susuga i le Faafeagaiga ia Koriamatamu na faaulufaleina lona sa, o Mose o le Faifeau Asofitu Misiona i Lauili na faitauina le Tusi Paia, o Malo Afia FS o le faafeagaiga a le EFKS Aufaga na saunia talosaga, a o a'u lava na faia le upu faamafanafana.

Sa molimau le Tiakono ia Tuialii Sua i le la mafutaga ma le tina, a e o le faletua ia Ataata Tapunuu Sevani na fai ma sui o le fanau, ma na auga ia molimau o se tina alofa ma osi aiga.

Sa ta'ua lava foi ia uiga lelei o le tina e le Afioga ia Tuilaepa Lupesoliai Sailele na fai ma sui o lona aiga, ma le Afioga ia Tuialii Kirisimasi na fai ma sui o le aiga o le tamā ia Tuialii Sua. Molimau foi Emy Toleafoa o le tina o le galuega i Lauili e fai ma sui o le Mafutaga a Tina o le Aulotu i Lauili, o se tina lototele ma taulagalaga i mea lelei auā le atina'e o le galuega. Na ta'ua lava foi ia uiga lelei i le molimau a Tina o le nuu e pei ona saunoa i ai le Afioga i le Faletua ia Sofia Fuamatu. O se auauna sa aogā i lenei galuega auā sa fai ma faiaoga Aoga Aso Sa, o se sui foi o le aufaipese a lenei aulotu, a e o le faletua foi o le Tiakono. Na fa'aautū le molimau ma le feau faamafanafana i le matua, “*O Tapita, o le tina sa soifua mo Iesu.*” (Galuega 9:36). O a'u lava foi na ta'ita'i i ona sauniga i le tuugamau, ma matou faatofa atu ai i le Pese Faatofa a le Au Kerisiano. Manuia lau malaga tina.

Saunia susuga Pita Toleafoa FS

EFKS Lauili

Matagaluega Vaimauga

TASELE FAAMAO

TALIMALIE

(13/8/1958 - 17/9/2023 (64+11+13))

Na soifua mai le tamā ia Faamao Talimalie i le Aso Lulu 13/08/1958 ma papatisoina ai i le ekalesia i le Aso Sa 5/10/1958, a e na valaau le Atua ia te ia i le Aso Sa 17/9/2023; ua 64 tausaga, 11 masina ma aso 13. O ona toe sauniga sa faia i lona aiga i le aso 30/09/2023. Sa molimau le tina ia Saunoa i le mafutaga ma le tama o se tama alofa ia te ia ma le fanau. E le se tagata malosi a e na te faia uma galuega mo ia ma lana fanau. Sa autu foi le feau faamafanafana mo le tina ma le fanau ma aiga ua tuua i le loto tetele i le Alii auā ua uma ona ia saunia le nofoaga mo i tatou o lana fanau. O a'u lava na ta'ita'i i ona sauniga i le tuugamau ma sa matou faamavae atu ai i le pese faatofa a le au Kerisiano. Manuia lau malaga.

Saunia susuga Pita Toleafoa FS

EFKS Lauili,

Matagaluega Vaimaugu

Susuga Poka Toma Maua FT

“Aua o lo’u ola ua ia Keriso lea; a o lo’u oti o lo’u manuia lea.” Filipi 1:21.

O le susuga ia Poka Toma Maua FT, o le Toeaina Penisione o le EFKS Vaivase - tai i Vaimauga. Na soifua mai i le Aso Sa, 23 Ianuari 1949, mai ona tua’a o Limutau Dr. Maua Faitama’i Tupua, ma PeriseToma Maua. O ona nuu e aofia ai Satoalepai, Sapapalii ma Lona Fagalao. Na papatisoina ia Oketopa 1949, a e na faaekalesiaina i le 1963. E to’a 5 ona uso aofia ai le toeaina susuga Vaigalo Maua FT (EFKS Lufilufi) ma le faafeagaiga susuga Vavae Maua FS (EFKS Samauga), a e to’a 9 ona tuafafine. Na a’oa’oina i A’oga Tulagalua i Safotu, Tutaga, Lufilufi, A’oga Felela i Mulivai, Kolisi o Samoa, Kolisi Leulumoega Fou, sosoo ai le Kolisi Faafaifeau Malua, ma le Kolisi Faafaifeau a le Pasefika i Fiti. Na faaipoipo atu ia Malo Poka Maua ma la fanau ai o la’ua alo e to’a 4 ma fanau a fanau to’a 5. Na auina atu faamisionare i Ausetalia mo le 7 tausaga, foi mai faia’oga i le Kolisi Faafaifeau Malua mo le 2 tausaga. Na maua le avanoa e malaga i Iapani mo a’oa’oga faaopopo, a e na valaaulia e le EFKS Savaia Lefaga e fai mo latou faifeau i le 1988, ma galulue ai mo le 31 tausaga se’ia oo ina Malolo Penisione i le 2019. Na maluu i le Aso Toona’i, a o faagasolo faiga taulaga a le EFKS. O se ootootoga o lona soifuaga ma lana tautua i le Atua:

23/1/1949	Aso Fanau
Oketopa 1949	Papatisoina
1963	Faa-ekalesia
1954-1967	A’oga & Faigaluega
1968 - 1971	A’otauina Faafaifeau i Malua
1972 - 1974	Kolisi Faafaifeau Pasefika i Fiti
1975 - 1978	Galue Faiaoga Kolisi Maluafou, Leulumoega Fou, Tuasivi.
1978	Faaipoipo ma Malo T. Maua
1979	Faa’u Tofi Faifeau Samoa
1979 - 1985	Faamisionare i Ausetalia (7 yrs)
1986 - 1987	Faiaoga Kolisi Faafaifeau Malua
1988 - 2019	Faifeau Tausinuu Savaia Lefaga
1993- 1995	Komiti Tupe Matagaluega AANA
1998 - 2019	Toeaina Pulega Lefaga, AANA
Fono Tele 2019-	Penisione i le 70 tausaga.
18 Novema 2023 -	Maliu. Ua 74 tausaga, 9 masina ma aso e 27 le atoaga o lona soifua.

O le Aso Faraile 24 Novema 2023 na aveeseina mai ai lona tino maluu mai le Maota Faasausau o Sefo Pa’u ma momoli atu i lona aiga i Vaivase-tai. O le itula e 10.00 i le taeao na fai ai lona toe sauniga i le malumalu EFKS Vaivase-tai. O le faafeagaiga susuga Seilala Lumanuvae FS na ta’ita’i, fai le molimau faaleagaga ma saunia le Lauga. O le susuga Malotau Lafolafoga FS na faaulufaleina le sa o le Toeaina Penisione, o le Tusi Paia na folafolaina e Leefu Pule FS, a o Talosaga na taitaina e Ailani Tanielu FS.

Na molimau le Tina Penisione ia Malo i se tama alofa ma agamalu, agafiafia ma lotomaulalo, na latou maua ai se mafutaga e sili ona fiafia ma mafanafana. O le auuauna na saunia lelei mo le galuega tala’i ma folafola le Tala Lelei. E fiafia i musika faalelotu, naunau ia lelei viiga o le Atua ma ia faasoa atu i isi, lea na faatino e lona alo ia Muaausa Marshall i le galuega faipese i le tele o Aulotu. O Tupua Junior Maua na molimau fai ma sui o le fanau, a o le tuafafine ia Tafafotu Fuifui na fai ma sui o uso ma tuafafine e molimauina la latou mafutaga ma le toeaina. O le susuga Faraimo Tiitii FS (EFKS Utalii), na molimau fai ma sui o tama fanau a le EFKS Savaia Lefaga, e tusa o le galuega sa feagai ai ma le susuga i le Toeaina Penisione ma le Faletua i lo latou nuu. Na ta’ua ai se ta’ita’i lelei ma le mataala, se leoleo mamoe faamaoni ma alofa, e tusaafia e tagata lotu uma, sa pei o se tama valevale i le va ma le fanau, a o le tofa sinasina i le va fealoa’i ma le au matutua. Sa faapito lona ta’ua o le sao o Poka i le tapenaina o ia ma isi, mo le galuega faafaifeau EFKS.

Na molimau le afioga Taitaifono Komiti Au Toeaina, i se Toeaina sa i ai le tofa ma le agavaa na te fai ma ta’ita’i o le Ekalesia, peitai o Poka sa le’i naunau lava o ia e fia lauiloa pe fia mamalu. O le a manatua pea le tulaga ese o lana pata i tagapolo. Na mulia’i le molimau o le soifuaga faaleagaga na saunua i ai le susuga Seilala FS. Ona momoli atu lea o ia i lona oliolisaga tumau i lona aiga i Vaivase-tai, ma faamavae atu ai i le Pese Faatofa a le au kerisiano. Ua malie toa, ua malo tau, faafetai le molimau. *Le auuauna lelei e, ma le faamaoni, ulufale mai ia i le fiafia o lou Alii.* Faamaise le Atua i le Tina Penisione ia Malo ma le fanau, aiga ma uo, ma le Ekalesia.

Saunia: Faatonu Sulu, Faitoaga Tolua FS.

POKA MAUA FT,
(& Tina Penisione ia Malo Poka, nisi o fanau, ma ana grandchildren).



Laina i tua: Uligai Jacinta, Poka & Malo, Muausa Leatua Leape Marshall Maua.

Laina i Luma: April, Hesed, Poka Jr, Martasha. Ata na pu'e Kerisimasi '22.

SINA AILEPATA SUA TUALI' I FAOFUA



TASELE FAAMAO TALIMALIE



TEROA VAALELE

